



Павелай Галат можын хүзэглэгшэдтэ бэшэһэн хандалга

1 ¹Нэгэ хүнэй гү, али хэдэн хүнүүдэй эрхэ мэдэлээр бэшэ, харин Иисус Христосой, тэрэниие амидыруулһан Эсэгэ Бурханай мэдэлээр шэлэгдээд, элшэнгээр табигдаһан Павелһаа, ²тиин тэрэнтэй хамта байгааша хүзэглэгшэдһөө Галат можын хүзэглэгшэдэй бүлгэмдэ ³Эсэгэ Бурханһаа болон манай Дээдын Эзэн Иисус Христосхоо амар мэндые хүргэнэбди. ⁴Христос болбол манай Эсэгэ Бурханай эрхэ мэдэлээр бидэниие нүгэл шэбэлһээ, оршон үеын хорото муу байдалһаа аршалан сүлөөлхын түлөө ами бээ үргэл болгожо үгэһэн байна. ⁵Эсэгэ Бурханда хэтын хэтэдэ алдар соло! Болтогой.

Гансал Найн Мэдээсэлые баримталха ёһотойт

⁶ Агууехэ үршөөл хайраараа таанадые дуудаһан Христосхоо иимэ түргөөр холодожо, ондоо хургаал номнолдо хулжан ороходотнай би ехэ шаналжа байнаб. ⁷Христосой хургаалһаа ондоо үнэн зүб хургаал үгы юм! Харин таанадые үймүүлжэ, Христосой хургаалые буруудхаха ханаатай хүнүүд лэ бии. ⁸Таанадта урдань номногдоһон хургаалһаа ондоо хургаалые зааһан хүн бүхэн, бишье байгаа хаа, али тэнгэриһээ бууһан Бурханай Эльгээмэлшые байгаа хаа, булта хатуу хэһээлтэдэ хүртэг лэ. ⁹Таанадай хүлеэжэ абаһан хургаалда эсэргүүсэн зүршэһэн юумэндэ хургаһан хүн бүхэн хатуу хэһээлтэдэ хүртэг гэжэ би хаяхан хэлээ һэм, мүнөөшые дахин дабтанаб.

¹⁰ Иигэжэ хэлэхэдэ би хүнүүдэй хайшаалда хүртэхээ оролдоно гүб, али Бурханай хайшаалда гү? Иихэдэ хүнүүдтэ хаймһархаяа оролдоһон болоно гүб? Хэрбээ би хүнүүдэй урда хойгуур гүйдэг байгаа хаа, Христосой зараса байхагүй һэм.

Павелай элшэн болоһон тухай

¹¹ Аха дүүнэрни, минии таанадта номноһон Һайн Мэдээсэл хүнүүдээр дамжан ерээгүй юм гэжэ мэдэжэ абагты. ¹² Би тэрэниие хүнүүдһээ дуулаагүйб, нэгэшье хүн намайе тэрээндэ хургаагүй, харин Иисус Христос тэрэниие намда нээгээ юм.

¹³ Урдань иудейн ёһо гуримые бодотоор сахин ажамидаржа ябаһан тухаймни таанад дуулаа ёһотойт. Би Христосто хүзэглэдэг зониие гайтайгаар хашан мүрдэдэг, хандарган хосороодог һэм. ¹⁴ Би үбгэ эсэгэнэрэйнгээ ёһо гуримуудые ханалгатайгаар баримталдаг, шажанайнгаа хуули ёһые өөрынгөө үетэнһөө үлүү хайнаар сахидаг бэлэйб. ¹⁵ Үшөө эхынгээ умайда байхадамни Бурхан агууехэ үршөөл хайраараа намайе шэлэжэ абаад, ¹⁶ Хүбүүн тухайгаа үнэн зүбые нээгээд, бусад арадуудта Христос тухай номнохыемни захираа бэлэй. Тиихэдэ би өөртөө хүнгэн харгы шэлээгүй һэм. ¹⁷ Намһаа урда элшэнэрээр табигдаһан зонтой уулзахаяашье би Иерусалим ошоогүй бэлэйб. Харин Аравийн газар нютагаар ябаад, һүүлдэнь Дамаск хото бусажа ерээ һэнби.

¹⁸ Гурбан жэлэй үнгэрһэн хойно би Пётртой уулзахаяа Иерусалим ошоо бэлэйб. Тэндэ тэрэнтэй арбан дүрбэн үдэр байлсаа һэм. ¹⁹ Иисусай дүү хүбүүн Яковһаа бэшэ ондоо элшэнэрые би хараагүй һэм. ²⁰ Таанадта минии бэшэжэ байһан бүхы юумэн үнэн зүб юм гэжэ Бурхан мэдэнэ.

²¹ Һүүлдэнь би Сириин, Киликийн газар дайдаар ябааб. ²² Иудейн орон нютагта ажаһуудаг Христосто хүзэглэгшэ бүлгэмүүд намайе нюураарни танихагүй байгаа. ²³ Урдань тэдэниие хашан мүрдэдэг, хургаалыень хандарган халгаадаг хүн байһан аад, мүнөө тэрэ хургаалые номнодог гэжэл тэдэ нам тухай дуулаһан байна. ²⁴ Намтай тохёолдоһон ушарта баярлан, тэдэ хүзэглэгшэд Бурханиие алдаршуулжа байгаа.

Павел ба Иерусалимай элшэнэр

2 ¹ Арбан дүрбэн жэлэй үнгэрһэн хойно би Варнава Тит хоёрые абажа, дахин Иерусалим ерээ бэлэйб. ² Бурханай хүсэһэн хадань би иишэ ерээ һэм. Дэмы юумэ хэжэ байгаагүйгөө тодорхойлхын тула би бусад арадуудта номнодог хургаалаа эгээн хүндэтэ багшанарта баһа хөөрөө бэлэйб. ³ Юун гэжэ һананат? Замаймни нүхэр болохо Тит гэдэг грек хүбүүе бэлгээ отолуула гэжэ хэншье баалаагүй

юм. ⁴ Гансал худал хуурмаг хүзэгтэн энээн тухай хэлээ һэн. Иисус Христосой бидэндэ үгэһэн эрхэ сүлөө тухай тэдэнэр мэдэжэ, бидэниие дахин дарлаха ханаатайгаар тагнуулшад мэтэ мэхэ гохо гарган, бидэнэй дунда нюусаар шурган ороо бэлэй. ⁵ Харин бидэ хургаалай бодото удхые хэбээрнь таанадта дамжуулхын тула тэдэнэй үгэдэ ойро зуурашые ороогүй һэмди.

⁶⁻⁹ Харин Яков, Кефас (Пётр), Иоанн гэдэг эгээн хүндэтэ багшанар тухай хэлэбэл, урдань тэдэнэй ямар хүнүүд байһаниинь намда хамаагүй, юуб гэхэдэ, Бурхан хүниие яһаарнь илгадаггүй юм. Тэдэнэр Һайн Мэдээсэл номнохыемни намда зүбшөөгөө юм. Тэдэ нэрэ хүндэтэй зон бидэнтэй нэгэ ажал хэрэг бүтээжэ байһанаа баталан, Варнава бидэ хоёрой гарые бариба, Бурханһаа үршөөл хайра бидэндэ үгтэһые зүбшөөбэ. Тиигээд бидэ бусад арадуудые, харин тэдэ еврейнүүдые хургахань зүбтэй гэжэ тоолобо. Юундэ тиигээб гэбэл, еврейнүүдтэ номнохо үүргэ Пётрто Бурханһаа үгтэһэндэл адли бусад арадуудые хургаха үүргэ намда үгтөөд байһые тэдэнэр хараа ха юм. Яажа Пётр Бурханай хүсөөр элшэн болгогдоод, еврейнүүдтэ номнодог бэ, тон тиигэжэл бишые Бурханай хүсөөр элшэн болгогдоод, бусад арадуудые хургадаг болооб. ¹⁰ Тэдэ элшэнэр Иерусалимай ядуу хүзэглэгшэдэй бүлгэм тухай ханаагаа табижа ябахымнай бидэнһээ гуйгаа бэлэй. Тиимэһээ би энээндэ ханалаа табижа, тэдэ зондо туһалдаг байгаа.

Павел Пётрые Антиох хотодо шүүмжэлбэ

¹¹ Пётрой Антиох хото ерэхэдэнь, би тэрэниие шүүмжэлээб, юундэб гэхэдэ, тэрэ өөрыгөө доогуур абажа ябаа. ¹² Яковай хүнүүдэй Антиох ерэхын урда тээ Пётр бусад арадуудай дундаһаа Христосто хүзэглэһэн зоноор хамта хоол баридаг байгаа. Теэд Яковай зоной ерэхэдэ еврейнүүдһээ айжа, бусад арадуудай дундаһаа хүзэглэһэн зонһоо гэнтэ холодоод, суг эдеэлэлсэхээ болибо. ¹³ Тон тиигэжэл бусад еврей хүзэглэгшэд, тэдэнэй тоодо Варнавашые зүб харгыһаа хадууржа, нюур харадаг болоо.

¹⁴ Пётр үнэн зүб хургаалай ёһоор бээе абажа ябанагүй гэжэ мэдэхэдэ, би хүн зоной дунда: «Ши еврей хүн аад, бусад арадуудай дунда еврейнүүдэй ёһо гуримаар бэшэ, харин бусад арадуудай гуримаар бээе абажа ябаһан аад, яахадаа тэдэниие еврейнүүдэй ёһо гуримаар ябахыень баалаа хүмши», – гэжэ тэрээндэ сэхэ хэлэбэб.

Хүн Хуули сахиһаараа бэшэ, харин этигэлээрээ абарагдаха

¹⁵ Бидэшье түрэхэһөө еврейнүүд гээшэбди. Нүгэлтэ бусад арад бэшэ ха юмбиди. ¹⁶ Теэд нэгэшье хүн Хуули сахижа өөрыгөө хамгаалхагүй, харин Иисус Христосто этигэжэ абарагдаха юм гэжэ бидэ мэдэнэбди. Хуули сахижа «нэгэшье хүн абарагдахагүй» байһан дээрэһээ бидэ Хуули сахяад бэшэ, харин Иисус Христосто найдан абарагдахабди гэжэ Иисус Христосто этигээбди. ¹⁷ Хэрбээ бидэ Христостой нэгэдэн өөһэдыгөө сүлөөлхэ гэжэ байтараа, Хуули сахин нүгэл хэнэбди гэжэ баһа мэдэрбэл, Христос нүгэл хэлгэдэ хамһалсагша болоно гээшэ гү? Үгы даа! ¹⁸ Хэрбээ би гараараа һандарган һалгаһан юумээ дахин һэргээн бодхообол, үнэхөөрөө нүгэлтэн болохоб. ¹⁹⁻²⁰ Хуули үхэлһөө ондоо юумэ намда үгэжэ шадахагүй хадаа ажаמידаралдамни ямаршье удхагүй юм. Тиимэһээ би Бурханай түлөө амидарнаб. Мүнөө би өөрөө амидарна бэшэб, харин Христос зосоомни амидарна. Намда хайра дуратай байжа, минии түлөө өөрыгөө үргэһэн Бурханай Хүбүүндэ хүзэглэн этигэдэг дээрэһээ би мүнөө амиды ябанаб. Би Христостой хамта хэрээһэндэ хадуулааб. ²¹ Бурханай үршөөл хайраһаа би арсанагүйб. Хэрбээ гансал Хуули сахижа аршалагдаха аргатай байбал, Христос дэмы һаһа бараһан болоно гээшэ.

Этигэл хүзэгтэй байха гү, али Хуули сахиха гү?

З ¹ Ай, мунхаг тэнэг галадууд! Хэн таниие эльбэдэбэ гээшэб? Минии номноходо хэрээһэндэ саазалагдаһан Христосые таанад нүдөөрөө хаража байһандал байгаа бэшэ һэн гүт? ² Таанад Хуули сахижа байһан дээрэһээ гү, али Христосто этигэһэн дээрэһээ Нангин Һүлдэдэ хүртэбэ гүт гэжэ би таанадһаа һураха һанаатай байнаб. ³ Нангин Һүлдөөр дахуулжа ябаһан аад, мүнөө махабад бээдээ татуулаа гүт? Тиихэдээ таанад иимэ балар мунхаг хүнүүд гээшэ гүт? ⁴ Али таанадтай ушарһан бүхы юумэн дэмы үнгэрөө гээшэ гү? Дэмы үнгэрөөгүйл байгаа даа! ⁵ Хуули сахижа байһан дээрэһээтнай бэшэ, харин Христосто этигэһэн дээрэһээтнай Бурхан таанадта Нангин Һүлдые хайрлажа, гайхамшагта үйлэ хэрэгүүдые бүтээгээ юм.

⁶ Энээндэл адляар Абраһамай Бурханда этигэхэдэ, Бурхан тэрэниие үнэн сэдхэлтэн гэжэ тоолоо һэн. ⁷ Абраһамдал адли Бурханда хүзэглэдэг зон Абраһамай үри һадаһад гэжэ таанар мэдэжэ байгты. ⁸ Арадуудые этигэлээрнь Бурхан аршалан сүлөөлхэ юм гэжэ Нангин

Бэшэгтэ үни гэхээр уридшалан бэшэгдэһэн байна. Тэндэ Абраһамда: «Бурхан шамаар дамжуулан, бүхы арадууды абарха», – гэжэ хэлэгдэһэн байна. ⁹Тиимэхээ Бурханда хүзэглэһэн зон Абраһамтай хамта үршөөгдэхэ.

¹⁰ Харин Хуули сахижа аршалагдахаб гэжэ ханаһан хүн бүхэн хэһээгдэхэ. Юундэб гэхэдэ, «Хуулийн зүйл бүхэниие үргэлжэ гүйсэдхэжэ байгаагүй хүн бүхэн хэһээгдэхэ», – гэжэ Нангин Бэшэгтэ хэлээтэй байдаг. ¹¹ Хуули сахижа байһанаараа хэншые Бурханай абарал үршөөлдэ хүртэхэгүй, юундэб гэхэдэ, Нангин Бэшэгтэ: «Үнэн сэдхэлтэн этигэлээрээ амидарха», – гэжэ бэшэгдэнхэй юм. ¹² Хуули гээшэмнай хүгэдэлгэ бэшэ, тиимэхээ тэндэ: «Хуулийн зүйл бүхэниел гүйсэдхэдэг хүн амидарха», – гэжэ хэлэгдэнэ.

¹³ Дээрэмнай бууха ёһотой байһан Хуулийн хэһээлтэһээ бидэниие Христос аршалжа, тэрэ хэһээлтые өөр дээрээ даажа абанан юм. Тиимэхээ Хуули соо баһа иигэжэ бэшэгдэһэн байна: «Модондо үлгэжэ саазалууһан хүн хараалда хүртөө». ¹⁴ Иисус Христосоор дамжан найдуулагдаһан Нангин Һүлдые этигэлээрээ тогтоожо абахынь тула Абраһамай үршөөл хайра мүнөө бүхы арадуудта үгтэбэ гээшэ.

Бурханай найдуулга ба Хуули тухай

¹⁵ Аха дүүнэрни! Юрэ хэлэбэл, хүнэйшые бэшээд орхихон һүүлшын захяе хэншые хубилгажа шадахагүй юм. ¹⁶ Харин Абраһамда, тэрэнэй үридэ Бурхан найдуулга үгэһэн байгаа. Үри хүүгэдтэш гэжэ хэлэгдээгүй, харин үридэшни гэжэ нэгэл хүн тухай хэлэгдээ, тиин тэрэ нэгэнь – Христос гээшэ. ¹⁷ Христос тухай хэлсээе Бурханай баталһан саһаа дүрбэн зуун гушан жэл үнгэрһэн хойно бии болоһон Хуули энэ хэлсээе болюулха аргагүй, тиимэхээ Бурханай найдуулгань хүсэндөө үлэбэ гэжэ би хэлэнэб. ¹⁸ Юундэб гэхэдэ, хэрбээ уг залгамжалга Хуулийн ёһоор үгтэдэг һаа, найдалга хэрэггүй байгаа. Гэбэшье Бурхан Абраһамые найдуулһан ёһоороо шагналдаа хүртөөгөө ха юм.

¹⁹ Юундэ Хуули үгтэһэн байгаааб? Абраһамай үри бэсын ерэхэ гэжэ Бурханай найдуулһан саг хүрэтэр гэмтэ ябадал юун бэ гэжэ ойлгожо байхын тула энэ Хуули үгтэһэн байна. Энэ Хуули хүн зондо Эльгээмэлээр болон зууршалагшаар дамжуулан үгтэһэн байна. ²⁰ Теэд Бурхан гансаараа ха юм, тэрэ зууршалагы хэрэглэдэггүй юм.

²¹ Иихэдээ Хуули Бурханай найдуулга буруушаана гү? Үгы даа! Хэрбээ Хуули хүниие абарха аргатай байбал, Хуули гүйсэд сахидаг хүн бүхэн үнэн сэдхэлтэн болохо һэн. ²² Гэбэшье хүн бүхэн нүгэл шэбэлдэ унаад байна гэжэ Нангин Бэшэг соо хэлэгдэнэ. Энэ бэшэгдэһэн бүхэнэй ушарынь гэхэдэ, Иисус Христосто хүзэглэһэн бүхы зон этигэлээрээ Бурханай найдуулһые хүлээжэ абаха байна.

²³ Этигэлэй сагай ерээдүйдэ, этигэл хүзэгэй бидэндэ нээгдэтэр бидэ Хуулиин эрхэ мэдэлдэ ороод байгаабди. ²⁴ Иихэдээ Хуули гээшэмнай этигэл хүзэгөөрнай абардаг Христосто этигэхыемнай бидэниие бэлдэһэн шэрүүн хургагша байгаа гээшэ. ²⁵ Тиимэхээ этигэлэй сагай ерэхэдэ бидэ энэ шэрүүн хургагшын мэдэлһээ мултаран гараабди.

²⁶ Мүнөө таанад булта Иисус Христосто хүзэглэһэн этигэлээрээ Бурханай үхибүүд гээшэт. ²⁷ Иисус Христосой нэрэ алдараар уааар арюудхуулһан зон, таанад булта Иисус Христостой нэгэдэбэ гээшэт. ²⁸ Тиимэхээ мүнөө еврейнүүдшье, бусад арадуудшье илгаагүй, барлагуудшье, сүлөөтэйшүүлшье илгаагүй, эрэшүүлшье, эхэнэрнүүдшье илгаагүй. Таанад булта мүнөө нэгэн адли боложо, Иисус Христостой нэгэдэбэт. ²⁹ Хэрбээ Христостой нэгэдээд байбал, таанад Абраһамай үри хадаһад гээшэт, тиигээд Абраһамда найдуулһан бүхэниие залгамжалжа абахат.

Таанар зарасанар бэшэ, харин Бурханай үхибүүд гээшэт

4 ¹ Уг залгамжалагша балшар үхибүүн ябахадаа бүхы юумэнэй эзэн байбашье, зарасаһаа юугээрээшье илгардаггүй юм. ² Тиимэхээ Эсэгийн тогтооһон саг болзор хүрэтэр тэрэ үхибүүн даалгагдһан хүнүүдэй болон гэрэй захирагшын харууһа доро байдаг. ³ Бидэшье бага балшар наһандаа энэ дэлхэйн эмхи гуримгүй хүсэнүүдэй мэдэлдэ ороод байгаабди. ⁴⁻⁵ Харин саг болзорой ерэхэдэ, эхэнэрһээ түрэхэн Хүбүүгээ Бурхан эльгээбэ. Хуулиин эрхэ мэдэлдэ байһан хүнүүдые абархын тула, Бурханай найдуулһан юумэнэй уг залгамжалагшад болгохын тула түлөөһэ үгэжэ, эльгээһэн тэрэ Хүбүүниинь Хуулиин ёһоор ажамидаржа байгаа бэлэй. ⁶ Таанадай Бурханай уг залгамжалагшад болоһон хадатнай, Бурхан таанадта: «Аба, Эсэгэ», – гэжэ ооглоһон Хүбүүнэйнгээ Һүлдые эльгээгээ. ⁷ Иихэдээ ши зараса бэшэ, харин Христосоор дамжан, Бурханай хүбүүниинь, уг залгамжалагшань болобо гээшэш.

Павел галадуудта ханаагаа зобоно

⁸ Урдань таанад Бурханиие мэдэхэгүй байһан дээрэһээ үнэн дээрээ бурхад бэшэ «бурхадуудта» алба хэжэ байгаа бэлэйт. ⁹ Мүнөө таанад Бурханиие мэдэһэн аад лэ, тодорхойлон хэлэбэл, Бурханай таанадые мэдэһэн хойно таанад яагаад хүр хүсэгүй, ахир тулюур хүсэнүүдтэ дахин бусабат, тиигээд тэдэндэ алба хэхээ ханабат? ¹⁰ Таанад шажанай тусхай хайндэрнүүдые тэмдэглэн үнгэргэнэт. ¹¹ Танай дунда дэмы хурган номножо ябаа гэшэ гүб гэжэ би ханаагаа зобоноб.

¹² Аха дүүнэрни, намдал адли Хуулиин мэдэлһээ мултаран гарыг гэжэ би гуйнаб, юундэб гэхэдэ, би Хуулиин мэдэлһээ гаран, таанадтал адли хүн болоо һэнби. Таанад намайе огто гомдоогоогүй ха юмта. ¹³ Үбшэн ядуу байхадаа анха түрүүшынхиеэ таанадта хургаал номноһыемни таанад ханана ёһотойт. ¹⁴ Үбшэн ядуу байхадамни таанад һэжэглэнгүй, намайе өөһэдһөө түлхингүй, Бурханай Эльгээмэл мэтэ, Иисус Христостол адляар угтажа абаа бэлэйт. ¹⁵ Урматнай хосороо гэшэ гү? Тэрэ үедэ таанар нюдөөшье хайрлангүй, таһа татажа гаргаад, намда үгэхөөр бэлэн байгаа һэнта гэжэ би гэршэлнэб. ¹⁶ Таанадта үнэн зүбые номножо байһан дээрэһээ дайсантнай болобо гүб?

¹⁷ Тэдэ хүнүүд таанарта муу ханана, таанад тухай ханаагаа зобон хэбэр үзүүлхэ гэхэн хара ханаатай байна. Тэдэнэр бидэнэй эб таһалаад, анхаралыетнай өөһэдтөө хандуулха ханаатай юм. ¹⁸ Гансашье минии таанадтай суг байха сагта бэшэ, мүн хододоо нам тухай һонирхожо байбалтнай ехэ хайн байгаа. ¹⁹ Үхибүүдни, Христосто хүзэглэжэ байһантнай эли болохын тула би түрэжэ байһан эхэнэртэл адли зобожо байнаб, найдажа байнаб. ²⁰ Мүнөө таанадай дунда байбал, таанадтай ондоохоноор хөөрэлдэхэ байгааб, харин эндэһээ таанадтай юу хэхээ ойлгохоёо болёод байнаб.

Агарь Сарра хоёр болбол хоёр хэлсэнүүдтэл адли юм

²¹ Хуули сахихые ханаһан таанар мүнөө намда хэлэжэ үгыт, таанад Хуули гүйсэд ойлгоно аалта? ²² Абраһам хоёр хүбүүтэй байгаа: нэгыень зараса эхэнэр түрөө, нүгөөдыень сүлөөтэй эхэнэр түрөө гэжэ тэрэ Хуули соо бэшээтэй юм. ²³ Зараса эхэнэрһээ гараһан хүбүүниинь хүнүүдэй шиидхэбэрээр түрөө, харин сүлөөтэй эхэнэрһээ гараһан хүбүүниинь Бурханай найдүүлһан ёһоор түрөө бэлэй. ²⁴ Энэ

ушар гүнзэги удхатай юм: эдэ хоёр эхэнэрнүүд хоёр хэлсээнүүдтэл адли бшуу. Синай хада дээрэ үгтэһэн нэгэдэхи хэлсээниинь Хуули дээрэ үндэһэлнэ. Энэ хэлсээн зараса Агарьдал адли, барлагуудай хэлсээн юм. ²⁵ Агарь гэжэ Аравида оршодог Синай хада нэрлэдэг юм. Энэнь дарлалта доро байһан мүнөө үеын Иерусалим хотые бүхы хүн амитантайнь тэмдэглэдэг. ²⁶ Харин тэнгэрийн Иерусалим эрхэ сүлөөтэй юм. Тэрэ Иерусалим бидэнэй эхэ гээшэ. ²⁷ Тэрээн тухай Нангин Бэшэгтэ иигэжэ хэлэгдэнэ:

*«Үхибүү түрөөгүй, үри хүүгэдгүй эхэнэр,
хүхин баясыш!*

*Үхибүү түрэхын зоболон мэдэрээгүй эхэнэр,
хүхиш, баярлыш!*

*Юуб гэхэдэ, хадамда гараагүй эхэнэр
хадамтай эхэнэртэ ороходоо
тоогүй олон үхибүүтэй байха».*

²⁸ Аха дүүнэрни, таанад баһа Исаагтал адли Бурханай найдуулһан ёһоор түрөө гээшэт. ²⁹ Тиихэдэ хүнүүдэй хэлсээгээр түрэхэн хүбүүн Бурханай найдуулгаар түрэхэн хүбүүе яжа хашан мурдөө һэм, тиигэжэл мүнөө таанадыешье хашажа байна. ³⁰ Нангин Бэшэг соо энээн тухай: «Барлаг эхэнэрэй хүбүүн сүлөөтэй эхэнэрэй хүбүүнтэй хамта уг залгамжалхагүйн тула ши барлаг эхэнэрые хүбүүнтэйнь намна», – гэжэ бэшэгдэнхэй. ³¹ Тиимэхээ, аха дүүнэрни, бидэ зараса эхэнэрэй бэшэ, харин сүлөөтэй эхэнэрэй үхибүүд гээшэбди.

Эрхэ сүлөөдэ ажамидарагты

5 ¹ Христосой үршөөһэн эрхэ сүлөөдэ ажамидаржа байгты, дахин барлагууд бү бологты.

² Хэрбээ бэлгээ отолуулһан байбалтнай, Христос таанадта ямаршые аша туһа хүргэхэгүй гэжэ би Павел таанадта хэлэнэб. ³ Харин бэлгээ отолуулһан хүн бүхэн Хуулиин бүхы зүйлнүүдые гүйсэдхэхэ ёһотой болоно гэжэ баталан гэршэлнэб. ⁴ Хуули сахин өөһэдыгөө абарха ханаатайшуул Христосхоо түгдэрэн унажа, Бурханай үршөөл хайраһаа арсана гээшэ. ⁵ Харин бидэ Бурханай үршөөл хайрада хүртэжэ, өөһэдынгөө этигэлээр абарагдахбди гэжэ найданабди. ⁶ Иисус Христосой ашаар абарагдаха ханаатай байбал, бэлгээ отолуулаа гүбди, али отолуулаагүй гүбди – ямаршые илгаагүй юм, гансал хайра дура үгэдэг этигэл шухала юм.

⁷ Таанад найнаар эхилээ бэлэйт, теэд саашадаашье үнэн зүбье баримталхадатнай хэн таанадта хаалта хэбэб? ⁸ Иимэ буруу ханал бодолнуудые урдань таанадые дуудаһан Бурхан таанадта идхуулаа бэшэ. ⁹ Багахан эһээбэри бүхы эдьхүүрые эһээдэг юм. ¹⁰ Гэхэтэй сасуу таанад зүбөөр бодомжолжо байхат гэхэн найдалга Бурхан намда үгэнэ. Харин таанадые зүб харгыһаа хадууруулһан хүн, хэн-шье байг, илгаагүй зэмэлэгдэхэ.

¹¹ Аха дүүнэрни, хэрбээ бэлгээ отолуулхада аша тухатай юм гэжэ минии хөөрөжэ байбал, намайе хашан мүрдэхэгүй байгаа. Тиигэбэл Иисус Христосой хэрээһэн тухай хургаал би номнохогүй хэм, хүн зонойшье дунда худхалая хуймаа гарахагүй хэн. ¹² Танай дунда худхалая хуймаа гаргадаг зон таанадһаа холодобол хайн байгаа.

¹³ Аха дүүнэрни, Бурхан таанадые эрхэ сүлөөдэ дуудаа юм. Энэ эрхэ сүлөөтнай хүсэлэнгүүдээ хангахын тулада муу юумэ үйлэдэхэ харгыда таанадые гансал бү түлхиг. Таанад бэе бээдээ дуратай байгты, бэе бээдээ тухалжа байгты. ¹⁴ Юундэб гэхэдэ, Хуулиин бүхы зүйлнүүд: «Дүтынгөө хүндэ өөртөөл адли дуратай бай», – гэхэн энэ захяа заабари соо тобшологдоно. ¹⁵ Харин бэе бээе таһара удара таталсажа, эдилсэжэ байһаар таанар өөһэдыгөө бү сүм хюдажа халгаажархигты.

Нангин Һүлдын үрэ дүн, мүн махабад бэеын хүсэлэнгүүд тухай

¹⁶ Һүлдын хургаһан ёһоор ажамидаржа байгты, тиигэбэл муу муухай ябадал гаргахагүйт гэжэ би хэлэнэб. ¹⁷ Юуб гэхэдэ, махабад бэеымнай ханаашалһан юумэн Һүлдынхийһөө тад ондоо юм, тиин Һүлдын ханаашалһан юумэн махабад бэеынхийһээ тад илгаатай юм. Тиимэһээ таанад ханаһан юумээ олон ушарта хэдэггүй бшуут. ¹⁸ Хэрбээ таанадые Һүлдэ хүтэлжэ ябабал, Хуули таанадта хэрэггүй юм.

¹⁹ Махабад бэеын хүсэлэнгүүд гэхэдэ иимэ: эрэдээ гү, али эхэнэртээ урбаха, забхай зальхай, һамуу һэбхи ябадал гаргаха, ²⁰ онгонуудта мүргэхэ, эльбэ жадха хэхэ, зэбүүрхэхэ, хэрүүл ама гаргаха, атаархаха, уурлаха, дээрэлхүү зантай байха, арсалдаха ба хэрэлдэхэ, буруу үзэл номнохо, ²¹ жүтөөрхэхэ, алалсаха ба хюдалсаха, архидаха ба аашалха гэхэ мэтын буруу ябадалнууд. Иимэ муу юумэ үйлэдэжэ байгаа хүнүүд Бурханай хаан орондо уг залгамжалан орожо шадахагүй гэжэ урда хэлэһэнээ би дахин дабтанаб.

²² Нангин Һүлдын үрэ дүн болбол иимэ: хайра дуран, баяр, энхэ тайбан, тэсэбэри, хайн ханаан, ниигүүлэсхы сэдьхэл, үнэн сэхэ

ябадал, ²³ номгон даруу зан. Иимэ зондо Хуули хэрэггүй. ²⁴ Өөһө-
дыгөө Христос Иисуста зорюулхан хүнүүд махабад бэеэ хорхойтол-
готойнь, хурисал ташаяантайнь хэрээһэндэ хадаба гээшэ. ²⁵ Хэрбээ
бидэ Нангин Һүлдөөр ажамидаржа байбал, Һүлдын хургаһан ёһоор
лэ ябаял. ²⁶ Ехээрхүү дээрэлхүү зан гаргангүй, бэе бээдээ өөдэрхэн
хэрүүлхэнгүй, атаархангүй ябаял даа.

*Бэе бэеынгээ ашаа бэрхэшээл хубаалсажа,
бэе бээдээ туһалжа байгты*

6 ¹ Аха дүүнэрни, хэрбээ хэн нэгэнэй нүгэл хээ хаа, Һүлдын хур-
гаһан ёһоор ажамидардаг таанад иимэ хүниие даруу зангаараа
заһажа байгты. Тиихэдэ нүгэл шэбэл хэжэрхихэгүйн тулада өөһө-
дынгөө хойноһоо анхаржа ябагты. ² Христосой үгэһэн «хуули» иимэ:
бэе бэеынгээ ашаа бэрхэшээлые хубаалсажа, бэе бээдээ туһалжа
байгты. ³ Хэрбээ хэн нэгэн оройдоо хэншые бэшэ аад, бэеэ дээгүүр
абабал, тэрэ хүн өөрыгөө дэмы мэхэлнэ гээшэ. ⁴ Тиимэхээ хүн бү-
хэн бүтээһэн хэрэгүүдэйнгээ зэргээр өөрыгөө үнэлжэ байг. Ти-
гэбэл тэрэ хүн бэеэ бэшэнтэй сасуулангүй, ажал амжалтануудаараа
омогорхожо байха. ⁵ Юуб гэхэдэ, хүн бүхэн өөрынгөө ашаа бэрхэ-
шээлые өөр дээрээ абажа ябаха ха юм.

⁶ Бурханай хургаал заалгаһан хүн хурган хүмүүжүүлэгшэтэйгөө
бүхы эд зөөрөөрөө хубаалсаг.

⁷ Бурхание мэхэлхэ аргагүй юм. Тиимэхээ бү эндүүрэгты. Хүн
тариһанаал хададаг. ⁸ Махабад бэеынгээ хүсэлэнгүүдые хангажа бай-
даг хүн үхэл олохо, харин Нангин Һүлдын тулада оролдодог хүндэ
Нангин Һүлдэ мүнхын амидарал олгохо. ⁹ Тиимэхээ эсэхэ сусахые
мэдэнгүйгөөр хайн юумэ хэжэ ябагты. Гэдэргээ сухаряагүй хаа, би-
дэ саг болзортонь ургасаа хуряахабди. ¹⁰ Арга боломжотой байхадаа
бүхы хүнүүдтэ, илангаяа өөрынгөө бүлгэмэй хүзэглэгшэдтэ үлүү
ехээр хайниие хэжэ ябагты.

Түгэсхэлэй нэргылэлгэ ба амаршалга

¹¹ Энэ хандалгаяа таанадта ямар томо үзэгүүдээр бэшэһыемни
харагтыл даа. ¹² Хүнүүдтэ хайшаагдаха дуратай зон бэлгээ ото-
луулхыетнай баадхана, тиихэдээ тэдэнэр Христосой хэрээһэнэй
түлөө хашуулха мүрдүүлхэ дурагүй байна. ¹³ Тэдэ өөһөдөө отолуул-
хан мүртөө Хуули сахидаггүй юм, харин бэеэ хайрхахын тула таа-
надые отолуулха ханаатай байна. ¹⁴ Харин би юугээршые хайрхахаяа

Галадуудта 6

нананагүйб, гансал манай Дээдын Эзэн Иисус Христосой хэрээ-
нээр найрханаб. Минии урда энэ хэрээхэн дээрэ бүхы дэлхэйн
омогорхол хадагдаа, тиихэдэ би өөрөөшье энэ дэлхэйн омогорхо-
лой урда хэрээхэн дээрэ хадагдаад байнаб. ¹⁵ Отолуулхан гү, али
отолуулаагүй гү – тэрэнъ ямаршье хамаагүй. Шэнэ хүн бии боложо
мүндэлһэниинь лэ шухала юм. ¹⁶ Энэ гурим сахидаг хүн бүхэн, Из-
раилиин Бурханай хүнүүд энхэ тайбанда, үршөөл хайрада оршо-
хонь болтогой!

¹⁷ Саашадаа хэншье намда зоболон бү асараг, юуб гэхэдэ, би
Иисусай шархануудые бэе дээрээ абажа ябана ха юмбиб.

¹⁸ Аха дүүнэрни, манай Дээдын Эзэн Иисус Христосой үршөөл
хайранъ таанадтай оршожо байг лэ! Болтогой!